

六朝詩集

三

陳思王

書門	三七二八
類	一四八
函號	一〇
架	

內閣文庫	
漢書	三七二八
類	一〇
函	二架

內閣文庫	
番號	漢 3718
冊數	10 (3)
函號	319 13

0 1 2 3 4 5 6 7 8 9 10


A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak





陳思王集卷一

賦

東征賦 并序

淺草文庫

建安十九年王師東征吳寇余典禁兵衛官
省然神武一舉東夷必克想見振旅之盛故
作賦焉

登城隅之飛觀兮望六師之所營幡旗轉而心
異兮舟楫動而傷情顧身微而任顯兮愧任重
而命輕嗟我愁其何為兮心遙思而縣旌師旅
憑皇穹之靈佑兮亮元勳之必舉揮朱旗以

指芴橫大江而莫禦

遊觀賦

靜閒居而無事將遊目以自娛登北觀而啓路
涉雲際之飛除從羆熊之武士荷長戟而先驅
罷若雲歸會如霧聚車不及回塵不獲舉舊袂
成風揮汗如雨

懷親賦

并序

濟陽南澤有先帝故營遂停駕造斯賦焉
猶平原而南驚觀先帝之舊營步壁壘之常制
識旌旗之所停在官曹之典列心髣髴於平生

回驥首而永游赴脩途以尋遠情眷戀而顧懷
魂須臾而九反

玄暢賦

并序

夫富者非財也貴者非寶也或有輕爵祿而
重榮聲者或有反性命而徇功名者是以孔
老異情楊墨殊義聊作賦名曰玄暢

夫何希世之大人罄天壤而作皇該仁聖之上
義據神位以統方補五常之漏月綴三代以維
綱僥余生之倖祿邁九二之嘉祥上同契於稷
卨降合穎於伊望思薦寶以繼佩怨和璞之始

鐫思黃鍾以協律怨伶鼂之不存嗟所圖之莫
合悵蘊結而延佇希鵬舉以搏天蹶青雲而奮
羽企駟躍而改駕任中才之展御望前軌而致
策顧後乘而安驅匪逞邁之短脩長潛貞而保
素弘道德以爲宇築無怨以作藩溜慈惠以爲
圃畊柔順以爲田不媿景而慙魄言縣天之何
欲逸千載而流聲超遺黎而度俗

幽思賦

倚高臺之曲隅處幽僻之間深望翔雲之悠悠
羗朝霽而夕陰顧秋華而零落感歲暝而傷心
觀躍魚於南沼聆鳴鶴於北林搦素筆而慷慨
揚大雅之哀吟仰清風以嘆息寄余思於悲絃
信有心而在遠重登高以臨川何余心之煩錯
寧翰墨之能傳

節遊賦

覽宮宇之顯麗實大人之攸居建三臺於前處
飄飛陛以凌虛連雲閣以遠徑營觀榭於城隅
亢高輕以回眺緣雲霓而結䟽仰西嶽之崧岑
臨漳滏之清渠觀靡靡而無終何眇眇而難殊
亮虛厚之所處非吾人之所廬於是仲春之月

百卉叢生萋萋藹藹翠葉朱莖竹林青葱珍果
含榮凱風發而時鳥謹微波動而水蟲鳴感氣
運之和順樂時澤之有成遂乃浮素蓋御驂騶
命友生携同儔誦風人之所嘆遂駕言而出遊
步北園而馳騫庶翱翔以解憂望洪池之混漾
遂降集於輕舟浮沉蟻於金壘行觴爵於好逑
絲竹發而響厲悲風激於中流且容與以盡觀
聊永日而忘愁嗟羲和之奮迅怨曜靈之無光
念人生之不永若春日之微霜諒遺名之可紀
信天命之無常愈志蕩以游淫非經國之大綱

罷曲宴而旋服遂言歸乎舊房

感節賦

携友生而游觀盡賓主之所求登高墉以求望
冀消日以忘憂欣陽春之潛潤樂時澤之惠休
望候鴈之翔集想玄鳥之來遊嗟征夫之長勤
雖處逸而懷愁懼天河之一回沒我身乎長流
豈吾鄉之足顧戀祖宗之靈丘唯人生之忽過
若鑿石之末燿慕牛山之哀泣懼平仲之我咲
折若華之翳日庶朱光之常照願寄軀於飛蓬
乘陽風之遠飄亮吾志之不從乃拊心以嘆息

青雲鬱其西翔飛鳥翩而止匿欲縱體而從之
哀余身之無翼大風隱其四起揚黃塵之冥冥
鳥獸驚以來群草木紛其揚英見游魚之泔灑
感流波之悲聲內紆曲而潛結心怛惕以中驚
匪榮德之累身恐年命之早零慕歸全之明義
庶不忝其所生

離思賦 并序

建安十六年大軍西討馬超太子留監國植
時從焉意有憶戀遂作離思賦云
在肇秋之嘉月將曜師而西旗余抱疾以賓從

扶衡軫而不怡慮征期之方至傷無階以告辭
念茲君之光惠庶沒命而不疑欲畢力於旌麾
將何心而遠之願我君之自愛為皇朝而寶已
水重深而魚悅林脩茂而鳥喜

釋思賦 并序

家弟出養族父郎中伊余以兄弟之愛心有
戀然作此賦以贈之

彼翔友之離別猶求思乎白駒况同生之義絕
重背親而為踈樂鴛鴦之同池羨比翼之共林
亮根異其何戚痛別榦之傷心

臨觀賦

登高塘兮望四澤臨長流兮送遠客春風暢而
氣通靈草含幹兮木交莖丘陵岷兮松柏青南
園夢兮果載榮樂時物之逸豫悲余志之長遠
歎東山之愬勤歌式微以訴歸進無路以效功
退無隱以營私俯無鱗以游遁仰無翼以翻飛

潛志賦

潛大道以游志希往昔之遐烈矯貞亮以作矢
當苑囿以呈藝驅仁義以爲禽必忠信而後發
退隱身以滅迹進出世而取容且摧剛而和謀

接處肅以靜恭亮知榮而守辱匪徇天以爲通

閒居賦

何吾人之介特去朋正而無儔出靡時以娛志
入無樂以消憂何歲月之若驚復民生之無常
感陽春之發節聊輕駕之遠翔登高丘以延企
時薄暮而起余仰歸雲以載奔遇蘭蕙之長圃
冀芬芳之可服結春蘅以延佇入虛廊之閒館
步生風之高廡踐密邇之脩除即蔽景之玄宇
翡翠翔於南枝玄鶴鳴於北野青魚躍於東沼
白鳥戲於西渚遂乃背通谷對綠波藉文茵翳

春華丹轂更馳羽騎相過

愍子賦

彼凡人之相親小離別而懷戀况中殤之愛子
乃千秋而不見入空室而獨倚對孤幃而切歎
痛人亡而物在心何忍而復觀日晡晚而既沒
月代照而舒光仰列星以至晨衣霑露而含霜
惟逝者之日遠愴傷心而絕腸

叙愁賦

并序

時家二女弟故漢皇帝聘以為貴人家母見
二弟愁思故令余作賦曰

嗟妾身之微薄信未達乎義方遭母氏之聖善
奉恩化之彌長迄盛年而始立修女職於衣裳
承師保之明訓誦六列之篇章觀圖像之遺形
竊庶幾乎英皇委微軀乎帝室充末列於椒房
荷印綬之令服非陋才之所望對床帳而太息
慕二親以增傷揚羅袖而掩涕起出戶而彷徨
顧堂宇之舊處悲一別之異鄉

秋思賦

四節更王兮秋氣悲遙思愴况兮若有遺原野
蕭條兮煙無依雲高氣靜兮露凝野草變色兮

莖葉稀鳴蜩抱木兮鴈南飛歸室解裳兮步庭
前月光照懷兮星依天居一世兮芳景遷松喬
難慕兮誰能仙長壽命也兮獨何愆

九愁賦

嗟離思之難忘心慘毒而含哀踐南畿之末境
越引領之徘徊捲浮雲以太息顧攀登而無階
匪徇榮而愉樂信舊都之可懷恨時王之謬聽
受奸枉之虛辭揚天威以臨下忽放臣而不疑
登高陵而反顧心懷愁而荒悴念先寵之既隆
哀後施之不遂雖危亡之不豫亮無遠君之心

刈桂蘭而秣馬舍余車於西林願接翼於歸鴻
嗟高飛而莫攀因流景而寄言響一絕而不還
傷時俗之趨險獨悵望而長愁感龍鸞而匿跡
如吾身之不留竄江介之曠野獨眇眇而沉舟
思孤客之可悲改余身之翱翔豈天監之孔明
將時運之無常喟內思而自策算乃昔之愆殃
以忠言而見黜信無負於時王俗參差而不齊
豈毀譽之可同競昏瞽以營私害余身之奉公
共朋黨而妬賢俾余濟乎長江嗟大化之移易
悲性命之攸遭愁懔懔而繼懷惟慘慘而情挽

曠年載而不回長去君兮悠遠御飛龍之蜿蜒
揚翠電之華旌絕紫霄而高騫飄弭節於天庭
披輕雲而下觀覽九土之殊形顧南郢之邦壤
咸蕪穢而倚傾駭盤桓而思驤服仰御以悲鳴
持余袂而收涕僕夫感以失聲履先王之正路
豈淫徑之可遵知犯君之招咎耻干媚而求親
顧旋復之無軌長自棄於遐濱與麋鹿以爲群
宿林藪之歲暮野蕭條而極望曠千里而無人
民生期於必死何自苦以終身寧作清水之沉
泥不爲濁路之飛塵踐蹊隧之危阻登岩堯之
棄逐乃余行之所招

娛賓賦

遂衍賓而高會兮丹幃擘以四張辨中厨之豐
膳兮作齊鄭之妍倡文人騁其妙說兮飛輕翰
而成章談在昔之清風兮總賢聖之紀緝欣公
子之高義兮德芬芳其若蘭揚仁恩於白屋兮
踰周公之棄餐聽仁風以忘憂兮美酒清而肴

乾

愍志賦 并序

或人有好鄰人之女者時無良媒禮不成焉
彼女遂行適人有言之於余者余心感焉乃

作賦曰

竊託音於往昔迄來春之不從思同遊之無跡
情壅隔而靡通哀莫哀於永絕悲莫悲於生離
豈良時之難俟痛余質之日虧登高樓以臨下
望所歡之攸居去君子之清宇歸小人之蓬廬
欲輕飛而從之迫禮防之我拘

歸思賦

背故鄉而遷徂將遙憇乎他濱經平常之舊居
感荒壤而莫振城邑寂以空虛草木穢以荆榛
嗟喬木之無陰處原堊其何為信樂土之足慕
忽并日之載馳

靜思賦

夫何美女之爛妖紅顏擘而流光卓特出而無
匹呈才好其莫當性通暢以聰惠行嬾密而妍
詳蔭高岑以翳日臨淥水之清流秋風起於中
林離鳥鳴而相求愁慘慘以增傷悲余安能乎

淹留

陳思王集卷一

陳思王集卷二

賦

感婚賦

陽氣動兮淑清百卉鬱兮含英春風起兮蕭條
蟄蟲出兮悲鳴顧有懷兮妖嬈用搔首兮屏營
登清臺以蕩志伏高軒以游情悲良媒之不顧
慰歡媾之不成慨仰首而太息風飄飄以動纓

出婦賦

以才薄之陋質奉君子之清塵承顏色以接意
恐踈賤而不親悅新婚而忘妾哀愛惠之中零

遂隨頽而失望退幽屏於下庭痛一旦而見棄
心忉忉以飛驚衣入門之初服背床室而出征
攀僕御而登車左右悲而失聲嗟冤結而無訴
乃愁苦以長窮恨無愆而見棄悼君施之不終

洛神賦

并序

黃初三年余朝京師還濟洛川古人有言斯
水之神名曰宓妃感宋玉對楚王神女之事
遂作斯賦

余從京城言歸東藩背伊闕越轅轅經通谷陵
景山日既西傾車殆馬煩爾乃稅駕乎蘅臯秣

駟乎芝田容與乎陽林流盼乎洛川於是精移
神駭忽焉思散俯則未察仰以殊觀覩一麗人
於岩之畔迺援御者而告之曰爾有覲於彼乎
彼何人斯若此之艷也御者對曰臣聞河洛之
神名曰宓妃然則君王之所見也無乃是乎其
狀若何臣願聞之余告之曰其形也翩若驚鴻
婉若游龍榮曜秋菊華茂春松髣髴兮若輕雲
之蔽月飄飄兮若流風之回雪遠而望之皎若
太陽升朝霞迫而睨之灼若芙蓉出淥波穠纖
得中脩短合度肩若削成腰如約素延頸秀項

皓質呈露芳澤無加鉛華弗御雲髻峨峨脩眉
聯娟丹脣外朗皓齒內鮮明眸善睐輔靨承顙
瓌姿艷逸儀靜體閒柔情綽態媚於語言奇服
曠世骨像應圖披羅衣之璀璨兮珥瑤碧之華
琚戴金翠之首飾綴明珠以耀軀踐遠遊之文
履曳霧綃之輕裾散幽蘭之芳藹兮步踟躕於
山隅於是忽焉縱體以遨以嬉左倚采旄右蔭
桂旗攘皓腕於神澗兮采湍瀨之玄芝余情悅
其淑美兮心振蕩而不怡無良媒以接歡兮託
微波而通辭願誠素之先達兮解玉珮以要之

嗟佳人之信脩羗習禮而明詩抗瓊瑋以和余
兮指潛淵而爲期執眷眷之款實兮懼斯靈之
我欺感交甫之棄言兮悵猶豫而狐疑收和顏
而靜志兮申禮防以自持於是洛靈感焉徙倚
彷徨神光離合乍陰乍陽竦輕軀以鶴立若將
飛而未翔踐椒塗之郁烈步蘅薄而流芳超長
吟以永慕兮聲哀厲而彌長爾乃衆靈雜遝命
儔嘯侶或戲清流或翔神渚或採明珠或拾翠
羽從南湘之二妃携漢濱之游女嘆匏瓜之無
匹兮詠牽牛之獨處揚輕袿之綺靡兮翳脩袖

以延佇體迅飛鳧飄忽若神凌波微步羅襪生
塵動無常則若危若安進止難期若往若還轉
盼流精光潤玉顏含辭未吐氣若幽蘭華容婀娜
令我忘餐於是屏翳收風川后靜波馮夷鳴
鼓女媧清歌騰文魚以驚乘鳴玉鸞以偕逝六
龍儼其齊首載雲車之容裔鯨鯢踊而夾轂水
禽翔而爲衛於是越北沚過南岡紆素領回清
揚動朱唇以徐言陳交接之大綱恨神人之道
殊兮怨盛年之莫當抗羅袂以掩涕兮淚流襟
之浪浪悼良會之永絕兮哀一逝而異鄉無微

情以效愛兮獻江南之明璫雖潛處於太陰長
寄心於君王忽不悟其所含悵神霄而蔽光於
是背下陵高足徃神留遺情想像顧望懷愁翼
靈軀之復形御輕舟而上泝浮長川而忘反思
綿綿而增慕夜耿耿而不寐霑繁霜而至曙命
僕夫而就駕吾將歸乎東路攬駢轡以抗策悵
盤桓而不能去

愁霖賦

迎朔風而爰邁兮雨微微而逮行悼朝陽之隱
曜兮怨北辰之潛精神結轍以盤桓兮馬躑躅

以悲鳴攀扶桑而仰觀兮假九日於天皇瞻沉
雲之泱泱兮哀吾願之不將又曰夫季秋之淫
雨兮既彌日而成霖瞻玄雲之晻晻兮聽長空
之淋淋中宵卧而歎息起飾帶而撫琴

喜霽賦

禹身逝於陽旰卒錫圭而告成湯感旱於殷時
造桑林而敷誠動玉朝而雲披鳴鸞鈴而日陽
北極以爲期吾將倍道而兼行

登臺賦

按魏紀銅雀臺新成曹操將諸
子登臺使各爲賦植援筆立就
操大異之
即此賦也

從明后之嬉遊聊登臺以娛情見天府之廣開
觀聖德之所營建高殿之嵯峩浮雙闕乎太清
立中天之華觀連飛閣乎西城臨漳川之長流
望園果之滋榮仰春風之和穆聽百鳥之悲鳴
天功怛其既立家願得而獲呈揚仁化於宇內
盡肅恭於上京雖桓文之爲盛豈足方乎聖明
休矣美矣惠澤遠揚翼佐皇家寧彼四方同天
地之矩量齊日月之輝光 貴尊而無極等年
壽於 王

九華扇賦 并序

昔吾先君常侍得幸漢桓帝賜竹扇不方不
圓其中結成文名曰九華其辭曰

有神區之名竹生不周之高岑對綠水之素波
背玄澗之重深體虛暢以立榦播翠葉以成林
形五離而九華篋鰲解而縷分效虬龍之蜿蜒
法虹蜺之氤氳因形致好不常厥儀方不應矩
圓不中規隨皓腕以徐轉發惠風之寒微時氣
清以方厲紛飄動兮紈綺

寶刀賦

并序

建安中魏王命有司造寶刀五板以龍熊鳥

雀為識太子得一余與弟饒陽侯各得一
焉

有皇漢之明后思明達而玄通飛文藻以致博
揚武備以禦凶然後礪五方之石鑿以中黃之壤
規圓景以定環攄神思而造象陸剗犀革水斷
龍角輕擊浮截刃不織踰南越之巨闕超有
楚之泰阿寔真人之攸遇永天祿而是荷

車渠碗賦

惟斯椀之所生于涼風之浚采金光之定色
擬朝陽而發揮豐玄素之曄曄帶朱榮之葳蕤

緼絲綸以肆采布藤藻以相追翮飄颻而浮景
若鷲鵠之雙飛隱神璞於西野彌百葉而莫希
于時乃有篤恭神后廣被仁轂夷慕義而重使
獻茲珽於斯庭命公輸使匠窮妍麗之殊形
華色燦爛文若點成鬱翁雲蒸蜿蟬龍征光如
激影影若浮星何神恠之巨偉信一覽而九
雖離朱之聰目內炫耀而失精何明麗之可悅
超群寶而特章俟君子之間燕酌甘醴於斯觥
既娛情而可貴故求御而不忘

迷迭香賦

播西都之麗草兮應青春而凝暉流翠葉於纖
柯兮結微根於丹墀方莫秋之幽蘭兮儼崑崙
之英芝信繁華之速實兮弗見凋於嚴霜既經
時而收采兮遂幽殺以增芳去枝葉而持御兮
入綃縠之霧裳附玉體以行止兮順微風而舒
香

大暑賦

炎帝掌節祝融司方羲和按轡南雀舞衡蛇拆
鱗於靈窟龍解角於皓蒼遂乃温風赫戲草木
垂榦山折海沸沙融礫爛飛魚躍渚潛龜浮岍

鳥張翼而近棲獸交遊而雲散於時黎庶徒倚
綦布葉分機女絕綜農夫釋耘背暑者不謀而
齊跡向陰者不會而成群於是大人遷居宅幽
緩神育靈雲屋重構間房肅清寒泉涌流玄木
奮榮積素永於幽館氣飛結而為霜奏白雪於
琴瑟朔風感而增涼

神龜賦 并序

龜壽千歲時有遺余龜者數日而死肌肉消
盡唯甲存焉余感而賦之曰

嘉四靈之建德各潛位乎一方蒼龍虬于東嶽

白虎嘯於西岡玄武集於寒門朱雀栖於南鄉
順仁風以消息應聖時而后翔嗟神龜之奇物
體乾坤之自然下夷方以則地上規隆而法天
順陰陽以呼吸藏景曜於重泉餐飛塵以實氣
飲不竭於朝露步容趾以俯仰時鸞回而鶴顧
忽萬載而不恤周無疆於太素感白靈之翔翥
卒不免乎豫且雖見珍於宗廟懼剗剝之重辜
欲愬怨於上帝將等愧乎游魚懼沉沉之逢殆
赴芳蓮以巢居安玄雲而好靜不淫翔而改度
昔嚴周之抗節援斯靈而託喻嗟祿運之屯蹇

終遇獲於江濱歸寵檻以幽處遭淳美之仁人
晝顧瞻以終日夕撫順而接晨遘淫災以殞越
命勦絕而不振天道昧而未分神明幽而難燭
黃氏沒於空澤松喬化於扶木虵折鱗於平臯
龍脫骨於深谷亮物類之遷化疑斯靈之解殼

白鶴賦

嗟皓麗之素鳥兮含竒氣之淑祥薄幽林以屏
處兮蔭重景之餘光挾單巢於弱條兮懼衝風
之難當無沙棠之逸志兮欣六翮之不傷承避
逝之僥倖兮得接翼於鸞鳳同毛衣之氣類兮

信休息之同行痛美會之中絕兮遘嚴災而逢
殃太息而祗愴兮抑吞聲而不揚傷本之
違忤悵離群而獨處怛竄伏以窮栖獨哀鳴而
戢羽翼大綱之難結得奮翅而遠遊聆雅琴之
清韻託六翮之末流

蟬賦

唯夫蟬之清素兮潛厥類乎太陰在盛陽之仲
夏兮始遊豫乎芳林實淡泊而寡慾兮獨怡樂
而長吟聲皦皦而彌厲兮似貞士之介心內含
和而弗食兮與衆物而無求棲高枝而仰首兮

賴朝露之清流隱柔桑之稠葉兮快閒居而遁暑苦黃雀之作害兮患螳螂之勁斧冀飄翔而遠託兮毒蜘蛛之網罟欲降身而卑竄兮懼草蟲之襲予免衆難而弗獲兮遙遷集乎宮宇依名果之茂陰兮託脩榦以靜處有翩翩之狡童兮步容與於園囿體離朱之聰視兮姿才捷於猴猿條罔葉而不挽兮樹無榦而不緣翳輕軀而奮進兮跪側足以自間恐余身之駭驚兮精曾睨而目連持柔竿之冉冉兮運微黏而我纏欲翻飛而愈滯兮知性命之長捐委厥軀於

夫兮 炎炭而就燔秋霜紛以宵下晨風烈其過庭氣憊怛而薄軀足攀木而失莖吟嘶啞以沮敗狀枯槁以喪形辭曰詩嘆鳴蜩聲嘒嘒兮盛陽則來太陰逝兮皎皎貞素侔夷節兮帝臣是戴尚其潔兮

鸚鵡賦

美中州之令鳥越衆類之殊名感陽和而振翼遁太陰以存形遇旅人之嚴網 六翮之無遺身挂滯於重籠孤雌鳴而獨歸豈予身之足惜憐衆雛之未飛分靡軀以潤鑊何全濟之敢希

蒙含育之厚德奉君子之光輝怨身輕而施重
恐往惠之中虧常戢心以懷懼雖處安其若危
永哀鳴其報德庶終而不疲

鵑賦 并序

鵑之爲禽猛氣其鬪終無勝負期於必死遂
賦之

美遐圻之偉鳥生太行之崑阻軀貞剛之烈性
亮乾德之所輔戴毛角之雙立揚玄黃之勁羽
其沉隕而重辱有節士之儀矩降居擅澤高處
保岑遊不同嶺棲必異林若有翻雄駭遊孤雌

驚翔則長鳴挑敵鼓翼專揚踰高越壑雙不隻
僵階侍斯珥俯耀文墀成武官之首飾增庭燎
之高暉

離繳鴈賦 并序

余遊於武陵中有鴈離繳不能復飛顧命舟
人追而得之故憐而賦焉

憐孤鴈之偏特情惆焉而內傷含中和之絕氣
赴四節而征行遠玄冬於南裔避炎夏於朔方
掛微軀之輕翼忽頽落而離群旅暗驚而鳴遠
徒矯首而莫聞甘充君之下厨膏函牛之鼎鑊

蒙生全之顧覆何恩施之隆博於是縱軀歸命
無慮無求飢食稻梁渴飲清流

鷓鴣賦

曰鷓欲取雀雀言微賤身卑些小肌肉瘠瘦所
得蓋少君欲相噉實不足飽鷓得雀言初不敢
語頃來轍軻資糧乏旅三日不食畧思死鼠今
日相得寧復置汝雀得鷓言意甚征營性命至
重雀鼠貪生君得一食我命是傾皇天降鑒賢
者是聽鷓得雀言意甚怛惋當死敝雀頭如果
蒜不早首服挨頸大喚行人聞之莫不往觀雀

得鷓言意甚不移目如擘椒跳蕙二翅我當死
矣略無可避鷓乃置雀良久方去二雀相逢似
是公姬相將入草共上一樹仍叙本末辛苦相
語今者兒出為鷓所捕賴我翻捷體素便附說
我辯語千條萬句欺恐舍長令兒大怖我之得
免復勝於死自今徙意莫復相妬

蝙蝠賦

吁何奸氣生此蝙蝠形殊性詭每變常式行不
由足飛不假翼明伏暗動盡似鼠形謂鳥不似
二足為飛而含齒巢不哺殼穴不孔子不容

毛群斥逐羽族下不蹈陸一不馮木

芙蓉賦

覽百卉之英茂無斯華之獨靈結脩根於重壤
泛清流而擢莖其始榮也皦若夜光尋扶桑其
揚暉也晃若九陽出暘谷芙蓉蹇產齒齒星屬
絲條垂朱丹莖吐綠焜焜韡韡爛若龍燭觀者
終朝情猶未足於是狡童媛女相與同遊擢素
手於羅袖接紅葩於中流

酒賦 并序

余覽楊雄酒賦辭甚瑰瑋頗戲而不雅聊作

酒賦粗究其終始賦曰

嘉儀氏之造思亮茲美之獨珍仰酒旗之景曜
協嘉號於天辰穆生以醴而辭楚侯嬴感爵而
增其味有宜城醪醴蒼梧縹清或秋藏冬發
或春醞夏成或雲沸潮涌或素蟻浮萍爾乃王
孫公子遊俠翱翔將承芬以接意會陵雲於朱
堂獻酬交錯宴笑無方於是飲者並醉縱橫誼
譁或揚袂屢舞或扣劍清歌或嘖蹴辭觴或奮
爵橫飛或嘆驪駒既駕或稱朝露未稀於斯時
也質者或文剛者或仁卑者忘賤窶者忘貧於

是矯俗先生聞之而嘆曰噫夫言何容易此乃
淫荒之源非作者之事若耽于觴酌流情縱逸
先生所禁君子所斥

槐賦

羨良木之華麗爰獲貴於至尊憑文昌之華殿
森列峙乎端門觀朱棖而振條據文陛而結根
揚沉陰以博覆似明后之垂恩在季春以初茂
踐朱夏而乃繁覆陽精之炎景散流耀以增鮮

植橘賦

有朱橘之珍樹于鶉火之避鄉稟太陽之烈氣

嘉杲日之休光體天然之素分不遷徙于殊方
播萬里而遙植列銅雀之園庭背江川之暖氣
處玄朔之肅清邦換壤別爰用喪生處彼不凋
在此先零朱實不■焉得素榮惜寒暑之不均
嗟華實之永乖仰凱風以傾葉冀炎氣之所懷
颺鳴條以流響希越鳥之來棲夫靈德之所感
物無微而不和神蓋幽而易激信天道之不訛
既萌根而弗榦諒結葉而不華漸玄化而弗變
非彰德於邦家附微條以嘆息哀草木之難化

陳思王集卷二

[Faint bleed-through text from the reverse side of the page]

陳思王集卷三

詩

公宴

公子敬愛客終宴不知疲清夜遊西園飛蓋相
追隨明月澄清影列宿正參差秋蘭被長坂朱
華冒綠池潛魚躍清波好鳥鳴高枝神飈接丹
轂輕輦隨風移飄颻放志意千秋長若斯

侍太子坐

白日曜青春時雨靜飛塵寒氷辟炎景涼風飄
我身清醴盈金觴餼饌縱橫陳齊人進竒樂歌

者出西秦翩翩我公子機巧忽若神

七哀

明月照高樓流光正徘徊上有愁思婦悲歎有
餘哀借問嘆者誰言是宓子妻君行踰十年孤
妾常獨棲君若清路塵妾若濁水泥浮沉各異
勢會合何時諧願為西南風長逝入君懷君懷
良不開賤妾當何依

鬪雞

遊目極妙伎清聽厭宮商主人寂無為衆賓進
樂方長筵坐戲客聞鷄間觀房群雄正挈赫雙

翹自飛揚揮羽邀清風悍目發朱光紫落輕毛
散嚴距往往傷長鳴入青雲扇翼獨翱翔願蒙
狸膏助常得擅此場

元會

初歲元祚吉日惟良乃為佳會宴此高堂衣裳
鮮潔黼黻玄黃珍膳雜選充溢圓方俯視文軒
仰瞻華梁願保茲喜千載為常歡笑盡娛樂哉
未央皇家榮貴壽考無疆

送應氏二首

步登北邙阪遙望洛陽山洛陽何寂寞宮室盡

燒焚垣墻皆頓擗荆棘上叅天不見舊耆老但
觀新少年側足無行徑荒疇不復田游子久不
歸不識陌與阡中野何蕭條千里無人煙念我
平生親氣結不能言

又

清時難屢得嘉會不可常天地無終極人命若
朝霜願得展嬾姹我友之朔方親昵並集送置
酒此河陽中饋豈獨薄賓飲不盡觴愛至望苦
深豈不愧中腸山川阻且遠別促會日長願爲
比翼鳥施翮起高翔

雜詩六首

高臺多悲風朝日照北林之子在萬里江湖迥
且深方舟安可極離思故難任孤鴈飛南游過
庭長哀吟翹思慕遠人願欲託遺音形影忽不
見翩翩傷我心

其二

轉蓬離本根飄颻隨長風何意迴飈舉吹我入
雲中高高上無極天路安可窮類此客游子捐
軀遠從戎毛褐不掩形薇藿常不充去去莫復
道沈憂令人老

其三
西北有織婦綺縞何繽紛
明晨秉機杼日昃不成文
太息終長夜悲嘯守青雲
妾身入空閨良人行從軍
自期三年歸今已歷九春
飛鳥繞樹翔嗷嗷鳴索群
願爲南流景馳光見我君

其四

南國有佳人容華若桃李
朝遊江北岸夕宿瀟湘
沚時俗薄朱顏誰爲發
皓齒俯仰歲將暮榮曜難
久恃

其五

僕夫早嚴駕吾行將遠遊
遠遊欲何之吳國爲我仇
將聘萬里途東路安足由
江介多悲風淮泗馳急流
願欲一輕濟惜哉無方舟
閒居非吾志甘心赴國憂

其六

飛觀百餘尺臨牖御標軒
遠望周千里朝夕見來原
烈士多悲心小人媮自閒
國讐亮不塞甘心思喪元
拊劍西南望思欲赴太山
絃急悲聲發聆我慷慨言

喜雨

天覆何彌廣包育此群生棄之必憔悴惠之則
滋榮慶雲從北來鬱述西南征時雨終夜降長
雷周我庭喜種盈膏壤登秋必有成

離友

并序

鄉人有夏侯威者少有成人之風余尚其爲
人與之昵好王歸振旅送余於魏邦心有眷
然爲之隕涕乃作離友之詩其辭曰

王旅遊兮昔故鄉彼君子兮篤人剛勝余行兮
歸朔方馳原隰兮尋舊疆載車奔兮馬繁驤涉
浮濟兮泛輕航迄魏都兮息蘭房展宴好兮惟

樂康

應詔

肅承明詔應會皇都星陳夙駕秣馬脂車命彼
掌徒肅我征旅朝發鸞臺夕宿蘭渚芒芒原隰
祁祁士女經彼公田樂我稷黍爰有樛木重陰
匪息雖有餼糧飢不遑食望城不過面邑不遊
僕夫警策平路是由玄駟藹藹揚鑿漂沫流風
翼衡輕雲承蓋涉澗之濱綠山之隈遵彼河澗
黃阪是階西躋關谷或降或升駢駟倦路載寢
載興將朝聖皇匪敢晏寧弭節長騫指日遄征

前驅舉燧後乘抗旌輪不遑運鸞無廢聲爰暨
帝室稅此西墉嘉詔未賜朝覲莫從仰瞻城闕
俯惟闕庭長懷永慕憂心如醒

贈徐幹

驚風飄白日忽然歸西山圓景光未滿衆星繁
以繁志士營世業小人亦不閒聊且夜行遊遊
彼雙闕間文昌鬱雲興迎風高中天春鳩鳴飛
棟流焱激檻軒顧念蓬室士貧賤誠足憐薇藿
弗充虛皮褐猶不全忼慨有悲心興文自成篇
寶棄怨何人和氏有其愆彈冠俟知己知己誰
不然良田無晚歲膏澤多豐年亮懷璫璵美積
久德愈宣親交義在敦申章復何言

贈丁儀

初秋涼氣發庭樹微消落凝霜依玉除清風飄
飛閣朝雲不歸山霖雨成川澤黍稷委疇隴農
夫安所獲在貴多忘賤爲恩誰能博狐白足御
冬焉念無衣客思慕延陵子寶劍非所惜子其
寧爾心親交義不薄

贈王粲

端坐苦愁思攬衣起西游樹木發春華清池激

長流中有孤鴛鴦哀鳴求匹儔我願執此鳥惜
哉無輕舟欲歸忘古道顧望但懷愁悲風鳴我
側義和逝不留重陰潤萬物何懼澤不周誰令
君多念遂使懷百憂

又贈丁儀王粲

從軍度函谷驅馬過西京山岑高無極涇渭揚
濁清壯哉帝王居住佳麗殊百城員闕浮出雲承
露槩泰清皇佐揚天惠四海無交兵權家雖愛
勝全國爲令名君子在末位不能歌德聲丁生
怨在朝王子權自營歡怨非貞則中和誠可經

贈白馬王彪

謁帝承明廬逝將歸舊疆清晨發皇邑日夕過
首陽伊洛廣且深欲濟川無梁汎舟越洪濤怨
彼東路長顧瞻戀城闕引領情內傷

太谷何寥廓山樹鬱蒼蒼霖雨

泥我塗流潦浩縱橫中達絕無軌改轍登高岡
脩坂造雲日我馬玄以黃玄黃猶能進我思鬱
以紆鬱紆將難進親愛在離居本圖相與偕中
更不克俱鴟梟鳴衡柅豺狼當路衢蒼蠅間白
黑讒巧令親踈欲還絕無蹊攬轡止踟躕踟躕

亦何留相思無終極秋風發微涼寒蟬鳴我側
原野何蕭條白日忽西匿歸鳥赴喬林翩翩厲
羽翼孤獸走索群啣草不遑食感物傷我懷撫
心長太息太息將何爲天命與我違柰何念同
生一往形不歸孤寬翔故域靈柩寄京師存者
忽復過亡沒身自衰人生處一世去若朝露晞
年在桑榆間影響不能追自顧非金石咄嗒令
心悲心悲動我神棄置莫復陳丈夫志四海萬
里猶比隣恩愛苟不虧在遠分日親何必同衾
懣然後展慇懃憂思成疾疾無乃兒女仁倉卒

骨肉情能不懷苦辛苦辛何慮思天命信可疑
虛無求列仙松子久吾期戀故在斯須百年誰
能持離別永無會執手將何時王其愛玉體俱
享黃髮期收泪即長跼援筆從此辭

贈丁翼

嘉賓填城闕豐膳出中厨吾與二三子曲宴此
城隅秦箏發西氣齊瑟揚東謳肴來不虛歸觴
至反無餘我豈狎異人朋友與我似大國多良
材譬海出明珠君子義休待小人德無儲積善
有餘慶榮枯立可湏滔蕩固大節世俗多所拘

君子通大道無願爲世儒

朔風

仰彼朔風用懷魏都願騁代馬倏忽北徂凱風
永志思彼蠻方願隨越鳥翻飛南翔四氣代謝
懸景運周別如俯仰脫若三秋昔我初遷朱華
未希今我旋止素雪云飞俯降千仞仰登天阻
風飄蓬飛載離寒暑千仞易陟天阻可越昔我
同袍今永乖別子好芳草豈忘爾貽繁華將茂
秋霜悴之君不垂眷豈云其誠秋蘭可喻桂樹
冬榮絃歌蕩思誰與消憂臨川慕思何爲泛舟

豈無和樂游非我鄰誰忘泛舟愧無榜人

矯志脫二句之下

芳樹雖香難以餌烹尸位素餐難以成名磁石
引鐵於金不連大朝舉士愚不聞焉抱璧塗乞
無爲貴寶履仁遘福無爲貴道鴛鴦遠害不羞
卑棲靈虬避難不耻汚泥都蔗雖甘杖之必折
巧言雖美用之必滅濟濟唐朝萬邦作孚逢蒙
雖巧必得良弓聖主雖知必得英雄螳螂見嘆
齊士輕戰越王軾蛙國以死獻道遠知驥世僞
知賢覆之疇之順天之矩澤如凱風惠如時雨

口爲禁闥舌爲發機門機之關楛天不追

閨情二首

攬衣出中閨逍遙步兩楹閒房何寂寞綠草被
堦庭空穴自生風百鳥翔南征春思安可忘憂
戚與君并佳人在遠道妾身單且榮歡會難再
遇芝蘭不重榮人皆棄舊愛君豈若平生寄松
爲女蘿依水如浮萍齋身奉衿帶朝夕不墮頰
儻終顧盼恩永副我中情

有美一人被服織羅妖姿艷麗若春華紅顏
擘擘雲髻嵯峨彈琴撫節爲我絃歌清濁齊均

既亮且和取樂今日違恤其他

三良

功名不可爲忠義我所安秦穆先下世三臣皆
自殘生時等榮樂既沒同憂患誰言捐軀易殺
身誠獨難攬涕登君墓臨穴仰天歎長夜何冥
冥一往不復還黃鳥爲悲鳴哀哉傷肺肝

責躬

於穆顯考時惟武皇受命於天寧濟四方朱旗
所拂九土披攘玄化滂流荒服來王超商越周
與唐比蹤篤生我皇亦世載聰武則肅烈文則

時雍受禪于漢君臨萬邦萬邦既化率由舊則
廣命懿親以藩王國帝曰爾侯君茲青土奄有
海濱方周于魯車服有輝旗章有叙濟濟雋乂
我弼我輔伊予小子恃寵驕盈舉挂時網動亂
國經作藩作屏先軌是墮傲我皇使犯我朝儀
國有典刑我削我紕將寘于理元兇是率明明
天子時篤同類不忍我刑暴之朝肆違彼執憲
哀予小子改封充邑于河之濱股肱弗置有君
無臣荒淫之闕誰弼予身瑩瑩僕夫于彼冀方
嗟予小子乃懼斯殃赫赫天子恩不遺物冠我

玄冕要我朱紱光光大使我榮我華剖符授王
王爵是加仰齒金璽俯執聖策皇恩過隆祗承
怵惕咨我小子頑兇是嬰逝慚陵墓存愧闕庭
匪敢傲德寔恩是恃威靈改加足以沒齒昊天
罔極生命不圖常愆顛沛抱罪黃壚願蒙矢石
建旗東嶽庶立毫釐微功自贖危軀受命知足
免戾甘赴江湘奮戈吳越天啓其衷得會京畿
遲奉聖顏如渴如飢心之云慕愴矣其悲天高
聽卑皇肯照微

情詩

微陰翳陽景清風飄我衣遊魚潛綠水翔鳥薄
天飛眇眇客行士徃役不能歸始出嚴霜結今
來白露晞遊者嘆黍離處者歌式微慷慨對嘉
賓悽愴內傷悲

妬

嗟爾同衾曾不是志寧彼冶容安此妬忌

言志

慶雲未時興雲龍潛作魚神鸞失其儔還從燕
雀居

芙蓉池

逍遙芙蓉池翩翩戲輕舟南楊雙栖鵠北柳有
鳴鳩

陳思王集卷三

陳思王集卷四

詩

筮篴引

置酒高殿上親友從我遊中厨辦豐膳烹羊宰
肥牛秦箏何慷慨齊瑟和且柔陽阿奏竒舞京
洛出名謳樂飲過三爵緩帶傾庶羞主稱千金
壽賓奉萬年酬久要不可忘薄終義所尤謙謙
君子德罄折何所求驚風飄白日光景馳西流
盛時不再來百年忽我道生存華屋處零落歸
山丘先民誰不死知命復何憂

雜詩

悠悠遠行客去家千餘里出亦無所之入亦無所止浮雲翳日光悲風動地起

升天行二首

乘躋追術士遠之蓬萊山靈液飛素波蘭桂上
叅天玄豹遊其下翔鷗戲其巔乘風忽登舉彷彿見衆仙

扶桑之所出乃在朝陽蹊中心凌蒼昊布葉蓋
天涯日出登東幹既夕沒西枝願得紆陽轡回日使東馳

仙人篇

仙人攬六著對博太山隅湘娥拊琴瑟秦女吹
笙竽玉樽盈桂酒河伯獻神魚四海一何局九州安所如韓終與王喬要我於天衢萬里不足步輕舉凌太虛飛騰踰景雲高風吹我軀迴駕觀紫微與帝合靈符閭闔正嵯峩雙闕高丈餘玉樹扶道生白虎夾門樞驅風游四海東過王母廬俯觀五嶽間人生如寄居潛光養羽翼進趨且徐徐不見軒轅氏乘龍出鼎湖徘徊九天上與爾長相須

妾薄命二首

携玉手喜同車，北上雲閣飛除。鈞臺蹇產清虛，
池塘觀沼可娛。仰泛龍舟綠波，俯擢神草枝柯。
想彼宓妃洛河，退詠漢女湘娥。

日月既逝西藏，更會蘭室洞房。華燈步障舒光，
皎若日出扶桑。促樽合坐行觴，主人起舞盜盤。
能者穴竊別端，騰觚飛爵闌干。同量等色齊顏，
任意交屬所歡。朱顏發外形蘭，袖隨禮容極情。
妙舞僊僊體輕裳，解履遺絕纓。俛仰笑誼無呈，
覽持佳人玉顏。齊舉金爵翠盤，手形羅袖良難。

腕若不勝珠環，坐者嘆息舒顏。御中裛粉君傍，
中有霍納都梁。鷄舌五味雜香，進者何人齊姜。
恩重愛深難忘，召延親好宴私。但歌盃來何遲，
客賦既醉言歸。主人稱露未晞。

白馬篇

白馬飾金羈，連翩西北馳。借問誰家子，幽并游
俠兒。少小去鄉邑，揚聲沙漠垂。宿昔秉良弓楛，
矢何參差控弦破。左的右發，摧月支仰手接飛
猱。俯身散馬蹄，狡捷過猴獫。勇剽若豹螭，邊城
多警急。虜騎數遷移，羽檄從北來。厲馬登高堤。

長驅陷匈奴左顧陵鮮卑棄身鋒刃端性命安
可懷父母且不顧何言子與妻名在壯士籍不
得中顧私捐軀赴國難視死忽如歸

名都篇

名都多妖女京洛出少年寶劍值千金被服麗
且鮮鬪鷄東郊道走馬長楸間馳騁未能半雙
兔過我前攬弓捷鳴鏑長驅上南山左挽因右
發一縱兩禽連餘巧未能展仰手接飛鳶觀者
咸稱善衆工歸我妍婦來宴平樂美酒斗十千
膾鯁騰胎蝦炮鼈炙熊蹯鳴儔嘯匹侶列坐竟
景不可攀雲散還城邑清晨復來還

薤露行

天地無窮極陰陽轉相因人居一世間忽若風
吹塵願得展功勤輸力於明君懷此王佐才慷
慨獨不群鱗介尊神龍衆獸宗麒麟蟲獸豈知
德何況於士人孔氏刪詩書王業燦已分騁我
徑寸翰流藻垂華芬

豫章行二首

窮達難豫圖禍福信亦然虞舜不逢堯畊耘處

中田太公未遭文漁釣終渭川不見魯孔丘窮
困陳蔡間周公下白屋天下稱其賢
鴛鴦自朋親不若比翼連他人雖同盟骨肉天
性然周公穆康叔管蔡則流言子臧讓千乘季
札慕其賢

美女篇

美女妖且閒採桑岐路間柔條紛冉冉落葉何
翩翩攘袖見素手皓腕約金環頭上金雀釵腰
佩翠琅玕明珠交玉體珊瑚間木難羅衣何飄
飄輕裾隨風還顧盼遺光彩長嘯氣若蘭行徒

用息駕休者以忘餐借問女何居乃在城南端
青樓臨大路高門結重關容華耀朝日誰不希
令顏媒氏何所營玉帛不時安佳人慕高義求
賢良獨難衆人徒嗷嗷安知彼所觀盛年處房
室中夜起長歎

艷歌

出自薊北門遙望湖池桑枝枝自相值葉葉自
相當

遊仙

人生不滿百歲歲少歡娛意欲奮六翮排霧凌

紫虛蟬蛻同松喬翻跡登鼎湖翱翔九天上騁
轡遠行遊東觀扶桑曜西臨弱水流北極玄天
渚南翔陟丹丘

五遊

九州不足步願得凌雲翔逍遙八紘外游目歷
遐荒披我丹霞衣襲我素霓裳華蓋芬晻藹六
龍仰天驤曜靈未移景倏忽造昊蒼閭闔啓丹
扉雙闕曜朱光徘徊文昌殿登陟太微堂上帝
休西櫺群后集東廂帶我瓊瑤珮漱我沆瀣漿
踟躕玩靈芝徙倚弄華芳王子奉仙藥羨門進

竒方服食享遐紀延壽保無疆

梁甫行

八方各異氣千里殊風雨劇哉邊海民寄身於
草墅妻子像禽獸行止依林阻柴門何蕭條狐
兔翔我宇

丹霞蔽日行

紂爲昏亂虐殘忠正周室何隆一門三聖牧野
致功天亦革命漢祚之興秦階之衰雖有南面
王道陵夷炎光再幽殄滅無遺

怨歌行

為君既不易為臣良獨難忠信事不顯乃有見
疑患周公佐成王金滕功不刊推心輔王室二
叔反流言待罪居東國泣涕當流連皇靈大動
變震雷風且寒拔樹偃秋稼天威不可于素服
開金滕感悞求其端公旦事既顯成王乃哀嘆
吾欲竟此曲此曲悲且長今日樂相樂別後莫
相忘

善哉行

來日大難口燥唇乾今日相樂皆當喜歡經歷
名山芝草翩翩仙人王喬奉藥一丸自惜袖短

內手知寒慙無靈轍以救趙宣月沒參橫北斗
闌干親友在門飢不及餐

君子行

君子防未然不處嫌疑間瓜田不納履李下不
整冠周公下白屋吐哺不及餐一沐三握髮後
人稱聖賢

古樂府作古辭冠字下有四句嫂叔不
親長幼不比肩勞謙得其柄和光甚
獨難

平陵東

閭闔開天衢通被我羽衣乘飛龍乘飛龍與仙

期東上蓬萊採靈芝靈芝採之可服食年若玉
父無終極

苦思行

綠蘿綠玉樹光耀燦相輝下有兩真人舉翅翻
高飛我心何踊躍思欲攀雲追鬱鬱西嶽巔石
室青與天連中有着年一隱士鬚髮皆皓然
策杖從我遊教我莫忘言

遠游篇

遠游臨四海俯仰觀洪波大魚若曲陵承浪相
經過靈鼈戴方丈神嶽儼嵯峨仙人翔其隅玉

女戲其阿瓊葢可療飢仰首吸朝霞崑崙本吾
宅中州非我家將歸謁東父一舉超流沙鼓翼
舞時風長嘯激清歌金石固易敝日月同光華
齊年與天地萬乘安足多

吁嗟篇

吁嗟此轉蓬居世何獨然長去本根逝夙夜無
休閒東西經七陌南北越九阡卒遇回風起吹
我入雲間自謂終天路忽然下沉泉驚飈接我
出故歸彼中田當南而更北謂東而反西宕若
當何依忽亡而復存飄颻周八澤連翩歷五山

流轉無恒處誰知吾苦艱願爲中林草秋隨野
火燔糜滅豈不痛願與根荄連

鰕鮒篇

鰕鮒游潢潦不知江海流燕雀戲籓柴安識鴻
鵠遊世士誠明性大德固無儔駕言登五嶽然
後小陵丘俯觀上路入勢利惟是謀讐高念皇
家遠懷柔九州撫劔而雷音猛氣縱橫浮汎泊
徒嗷嗷誰知壯士憂

種葛篇

種葛南山下葛藟自成陰與君初婚時結髮恩

義深歡愛在枕席宿昔同衾竊慕棠棣篇好
樂和瑟琴行年將晚莫佳人懷異心恩紀曠不
接我情遂抑沉出門當何顧徘徊步北林下有
交頸獸仰見雙棲禽攀枝長嘆息淚下沾羅襟
良馬知我悲延頸代我吟昔爲同池魚今爲商
與參徃古皆歡遇我獨困於今棄置委天命悠
悠安可任

浮萍篇

浮萍寄清水隨風東西流結髮辭嚴親來爲君
子仇恪勤在朝夕無端獲罪尤在昔蒙恩惠和

樂如瑟琴何意今摧頽曠若商與參茱萸自有
芳不若桂與蘭新人雖可愛不若故所歡行雲
有反期君恩儻中還慊慊仰天嘆愁心將何訴
日月不恒處人生忽若寓悲風來入帷淚下如
垂露發篋造新衣裁縫紈與素

惟漢行

太極定二儀清濁始以形三光炤八極天道甚
著明爲人立君長欲以遂其生行仁章以瑞變
故誠驕盈神高而聽卑報若響應聲明主敬細
微三季曹天經二皇稱至化盛哉唐虞庭禹湯

繼厥德周亦致太平在昔懷帝京日昃不敢寧
濟濟在公朝萬載馳其名

當來日大難

日苦短樂有餘乃置玉樽辦東厨廣情故心相
於闔門置酒和樂欣欣遊馬後來轅車解輪今
日同堂出門異鄉別易會難各盡杯觴

野田黃雀行

高樹多悲風海水揚其波利劍不在掌結友何
須多不見籬間雀見鷄自投羅羅家得雀喜少
年見雀悲拔劍捎羅網黃雀得飛飛飛摩蒼

天來下謝少年

門有萬里客

門有萬里客問君何鄉人褰裳起從之果得心
所親挽裳對我泣太息前自陳本是朔方士今
為吳越民行行將復行去去適西秦

怨歌行

明月照高樓流光正徘徊上有愁思婦悲嘆有
餘哀解一借問嘆者誰自云蕩子妻夫行踰十載
賤妾常獨栖解二念君過於渴思君劇於飢君作
高山栢解一作妾為濁水泥解三北風行蕭蕭烈烈

入吾耳心中念故人淚墮不能止解四浮沉解五

路會合當何諧願作東北風吹我入君懷解五君

懷常不開賤妾當何依恩情中道絕流止任東

西解六我欲竟此曲此曲悲且長今日樂相樂別

後莫相忘解七

桂之樹行

桂之對桂之對桂生一何麗佳揚朱華而翠葉
流芳有天涯上有棲鸞下有盤螭桂之樹得道
之真人咸來會講仙教爾服食日精要道甚省
不煩淡泊無為自然乘躡萬里之外去留隨意

所欲存高高上際於衆外下下乃窮極地天

當牆欲高行

龍欲升天須浮雲人之仕進侍中人衆口可以
鑠金讒言三至慈母不親憤憤俗間不辯僞真
願欲披心自說陳君門以九重道遠河無津

當欲遊南山行

東海廣且深由卑下百川五嶽雖高大不逆垢
與塵良木不十圍洪條無所因長者能博愛天
下寄其身大匠無棄材船車用不均錐刀各異
能何所獨卻前嘉善而矜愚大聖亦同然仁者

各壽考四坐咸萬年

當事君行

人生有所貴尚出門各異情朱紫更相奪色雅
鄭異音聲好惡隨所愛憎追舉逐名百心可
事一君巧詐寧拙誠

當車以駕行

坐玉殿會諸貴客侍者行飭主人離席顧視
東西廂絲竹與鞞鐸不醉無歸來明燈以繼夕
飛龍篇

晨遊太山雲霧窈窕忽逢二童顏色鮮好乘彼

白鹿手翳芝草我知真人長跪問道西登玉堂
金樓複道授我仙藥神皇所造教我服食還精
補腦壽同金石永世難老

盤石篇


盤盤山巔石飄飄澗底蓬我本太山人何爲客
淮東薰葭彌斥土林木無分重岫巖苦崩缺湖
水何洶洶蚌蛤被濱涯光彩如錦虹高彼凌雲
霄浮氣象螭龍鯨脊若丘陵鬚若山上松呼吸
喬船櫂澎湃戲中鴻方舟尋高價珍寶艤以通
一舉必千里乘颶舉虬幢經危履險阻未知命

所鍾當恐沉黃媪下與鼉鼈同南極蒼梧野游
盼窮九江中夜指參辰欲師當定從仰天長太
息思想懷故邦乘桴何所志嗟嘆我孔公

驅車篇

驅車揮駑馬東到奉高城神哉彼泰山五嶽專
其名隆高貫雲霓嵯峨出太清周流二六候間
置十二亭上有湧醴泉玉石揚華英東北望吳
野西眺觀日精魂神所繫屬逝者感斯征王者
以歸天效厥元功成歷代無不遵禮記有品程
探策或長短唯德亨利貞封者七十帝軒皇元

獨靈餐霞漱沈瀟
羽被身形發舉蹈虛郭
從庭升窈冥同壽東父年曠代永長生



陳思王集卷四終

